

Pravilnik o radu džematskih odbora IZBNJ

(Nacrt za javnu raspravu)

Preambula

Islamska zajednica Bošnjaka u Njemačkoj donosi ovaj Pravilnik o radu džematskih odbora IZBNJ sa ciljem uspostavljanja jednoobraznog pristupa radu na nivou svih džemata i uspostavljanja jedinstvene strukture džemata IZBNJ na području Savezne Republike Njemačke.

Pravilnik o radu džematskih odbora predstavlja polaznu osnovu za regulisanje načina rada i djelovanja džematskih odbora IZBNJ, kao i njihove odgovornosti i ingerencije.

Misija Islamske Zajednice

Najvažnija funkcija Islamske Zajednice je afirmiranje islamskih vrijednosti u životu Bošnjaka. Islamska zajednica se brine o islamskom odgoju i obrazovanju svojih pripadnika i zalaže se za očuvanje vrijednosti braka i porodičnog života. Islamska zajednica se stara o vjerskim pravima muslimana i nastoji sačuvati tradicionalne i kulturalne vrijednosti bošnjačkoga naroda i jačati njegovu nacionalnu svijest. Imajući u vidu gore definisanu ulogu Islamske zajednice, džematski odbor radi na ostvarivanju i afirmisanju ciljeva Islamske zajednice, i doprinosi misiji i ostvarivanju njenih kratkoročnih i dugoročnih ciljeva.

Ovim pravilnikom se reguliše rad džematskog odbora, džemata koji su u sastavu Islamske zajednice Bošnjaka u Njemačkoj i Islamske zajednice u Bosni i Hercegovini.

§ 1 Cilj i svrha džematskog odbora

Osnova za djelovanje džemata u okviru IZBNJ je slijeđenje i promovisanje islamskog učenja uz poštivanje slobodarsko-demokratskog poretka SR Njemačke.

Džematski odbor svoje djelovanje usmjerava ka obavljanju i promociji aktivnosti džemata, koje poboljšavaju položaj i ugled članova Zajednice i svih muslimana u društvu na prostoru kojeg pokriva džemat.

Posebni ciljevi džematskog odbora su podrška i unaprjeđivanje rada džemata, te organizacija djelatnosti kojima se stiče, štiti i uvećava imovina džemata, bilo da je riječ o materijanim dobrima ili o ljudskim resursima.

Jedna od nadležnosti džematskog odbora jeste i aktivno uključivanje u rješavanje mogućih konfliktnih situacija, npr. međuljudski odnosi, nesporazumi u džematu, nesporazumi na liniji džematski odbor i imam itd. U slučaju nemogućnosti pronalaska kompromisnog rješenja džematski odbor je obavezan blagovremeno, prije eskalacije, obavijestiti Izvršni odbor medžlisa o nastaloj situaciji u džematu. Ukoliko Izvršni odbor medžlisa nije u mogućnosti riješiti nastalu situaciju, isti će obavijestiti Krovnu organizaciju Islamske zajednice Bošnjaka u Njemačkoj.

Daljnje ciljeve i svrhe reguliše jedinstveni džematski statut Islamske zajednice Bošnjaka u Njemačkoj.

§ 2 Način rada džematskog odbora

U svome radu džematski odbor poštuje odredbe njemačkog pravnog sustava i normativne akte IZBNJ i IZ-e BiH.

U vjerskim pitanjima svoga djelovanja džematski odbor primjenjuje hanefijski mezheb, maturidijsku akidu i islamsku tradiciju Bošnjaka.

§ 3 Sastav, mandat i odgovornosti džematskog odbora

Džematski odbor je sastavljen od minimalno 5 članova, čiji broj se može prilagoditi potrebi i brojčanom stanju džemata. Svi članovi se biraju na izborima shodno izbornim pravilima za organe džemata IZBNj, osim imama s dekretom Reisul-uleme, koji je član džematskog odbora po položaju. Funkcije u džematskom odboru su: imam, predsjednik, potpredsjednik, sekretar i blagajnik, te ostali članovi koji se biraju prema potrebi.

Džematski odbor u svome sastavu treba imati člana za edukaciju i rad sa ženama i predstavnika Mreže mladih, kako bi se podstaklo i afirmisalo njihovo aktivno učešće u radu cijelog džemata.

Članovi džematskog odbora su istaknuti članovi džemata poznati po svome primjerenom ponašanju i djelovanju, te slijeđenju islamskih principa u svojoj životnoj praksi.

Mandat članova džematskog odbora je 4 godine sa pravom ponovnog izbora.

Odluke u džematskom odboru se donose natpolovičnom većinom. Svi članovi džematskog odbora imaju pravu glasa. Imam kako član džematskog odbora ima pravo uložiti veto na odluke koje se kose sa islamskim principima i obavezan je argumentovano obrazložiti svoj stav. Sve odluke se protokolišu i potpisuju od strane sekretara i predsjednika džematskog odbora, te se unose u zapisnik koji je džemat dužan arhivirati.

Izabrani džematski odbor obavlja svoju dužnost i poslije isteka mandata sve do izbora.

Razrješeni džematski odbor dužan je organizovati primopredaju dužnosti novoizabranim članovima džematskog odbora u roku 15 dana od održavanja Izborne skupštine.

§ 4 Funkcije u džematskom odboru

4.1. Predsjednik džematskog odbora

Predsjednika džematskog odbora bira džematska skupština shodno izbornim pravilima.

Osim svoukupne odgovornosti za rad džematskog odbora, predsjednik zastupa džemat u javnosti i odgovoran je da se u radu džemata i džematskog odbora poštuje normativne akte IZBNj

Predsjednik saziva i vodi sastanke džematskog odbora

Predsjednik može u slučaju potrebe sazvati vanrednu sjednicu džematskog odbora i na zahtjev većine članova džematskog odbora

Predsjednik priprema dnevni red sastanka i konsultuje o tome se sa imamom i sekretarom, odnosno potpredsjednikom.

Predsjednik je obavezan proslijediti poštu i elektronsku poštu koja je pristigla na džematsku adresu i zvaničnu E-mail adresu džemata. Posebno onda kada ostali članovi džematskog odbora nemaju pristup poštanskom sandučetu i elektronskoj pošti.

Ukoliko predsjednik džematskog odbora podnese ostavku njegove obaveze preuzima potpredsjednik, koji je dužan u roku 30 dana organizovati vanrednu džematsku skupštinu na kojoj će se izabrati novi predsjednik džematskog odbora. Mandat novoizabranog predsjednika traje do kraja mandata džematskog odbora.

4.2. Potpredsjednik džematskog odbora

Potpredsjednika džematskog odbora bira džematska skupština shodno izbornim pravilima.

Potpredsjednik pruža podršku predsjedniku džematskog odbora i zastupa ga u odsustvu ukoliko ga predsjednik za to opunomoći.

4.3. Blagajnik

Blagajnik je zadužen za obavljanje finansijskih kretanja u džematu (uplate i isplate).

Blagajnik je odgovoran poštivati sve zakonske odredbe kada je u pitanju finacijsko poslovanje džemata.

Novčana imovina džemata nalazi se na bankovnom računu džemata, i blagajnik podnosi tromjesečni finansijski izvještaj na sjednicama džematskog odbora. Taj izvještaj podrazumjeva: sve prihode i rashode u proteklom periodu kao i trenutno stanje na džematskim bankovnim računima. U slučaju potrebe džematski odbor može zahtijevati da blagajnik i češće podnosi izvještaje na sjednicama džematskog odbora.

4.4. Sekretar

Sekretar vodi zapisnik na sjednicama džematskog odbora i isti proslijeđuje predsjedniku na potpis.

Sekretar vrši korespondenciju sa svim pravnim i fizičkim licima i obavlja administrativne poslove.

Sekretar je uključen u pripremu sjednica džematskog odbora i priprema godišnje izvještaje koji se prezentuju na džematskoj skupštini.

Sekretar džematskog odbora vodi evidenciju članova džemata i pohranjuje arhivu džematskog članstva.

4.5. Ostali članovi džematskog odbora

Džematski odbor sačinjavaju i drugi članovi koji mogu imati specifična zaduženja (humanitarni rad, rad sa ženama, rad sa omladinom, odnosi sa javnošću, mediji, tehnička podrška itd.) Svi članovi džematskog odbora koji obnašaju neku specifičnu funkciju su obavezni u okviru svoga resora izvještavati džematski odbor o planovima i rezultatima svojih aktivnosti. Prije sprovođenja određene aktivnosti potrebno je donijeti odluku na sjednici džematskog odbora.

4.6. Imam – član džematskog odbora po položaju

Imam organizuje vjerski život u džematu i održava veze sa javnošću u vezi sa vjerskim aktivnostima. Imam u svome radu podnosi izvještaj džematskoj skupštini i glavnom imamu medžlisa.

Imam je osoba koja posjeduje važeći Dekret za obavljanje funkcije imama izdat od strane Reisul-uleme IZ-e BiH.

Rad i obaveze imama naspram džemata i džematskog odbora regulisan je Pravilnikom o radu imama IZBNJ.

U situacijama kada džemat upošljava više od jednog imama, prvi imam je glavni imam džemata i on je nadležan za koordinaciju i raspored svih vjerskih aktivnosti u džematu.

§ 5 Izborni sistem

5.1. Izbore za članove džematskog odbora regulišu izborna pravila za organe džemata Islamske zajednice Bošnjaka u Njemačkoj.

§ 6 Sastanci džematskog odbora

Džematski odbor zajednički određuje vrijeme i mjesto sjednica. Sjednice se održavaju po potrebi, ali najmanje četiri puta godišnje. Prva sjednica nakon Skupštine je uvijek konstituirajuća sjednica.

Redovne i vanredne sastanke džematskog odbora saziva predsjednik. Svaki član džematskog odbora dužan je da prisustvuje sastanku. U hitnim slučajevima sastanak džematskog odbora se može zakazati telefonom.

Dnevni red sastanka džematskog odbora po pravilu priprema predsjednik u konsultaciji sa imamom, zamjenikom predsjednika i sekretarom.

Poziv za sasatanak džematskog odbora, sa dnevnim redom, svim članovima treba biti upućen najmanje 7 dana unaprijed. Članovi džematskog odbora dužni su svoje prijedloge za izmjenu i dopunu predloženog dnevnog reda poslati sekretaru ili predsjedniku najkasnije 2 dana prije održavanja sastanka. Prijedlozi za izmjenu ili dopunu dnevnog reda se usvajaju na početku sjednice prilikom usvajanja dnevnog reda pod uvjetom da dobiju natpolovičnu većinu prisutnih članova džematskog odbora.

Vanrednu sjednicu u kraćem roku nego je definisano u članu 6.4. može zakazati predsjednik uz saglasnost imama.

Ukoliko predsjednik nije u mogućnosti da zakaže vanrednu sjednicu, sjednicu mogu zajedno zakazati imam i potpredsjednik džematskog odbora.

Ukoliko jedan član nije u mogućnosti prisustvovati sjednici džematskog odbora dužan je, unaprijed najaviti i obrazložiti svoj izostanak, pri čemu će se voditi računa o potrebi traženja adekvatnijeg termina kojem će prisustvovati maksimalan broj članova džematskog odbora.

Džematski odbor može punopravno odlučivati ukoliko sastanku prisustvuje natpolovična većina njegovih članova, od kojih jedan mora biti predsjednik ili potpredsjednik i imam. Ukoliko na prvoj zakazanoj sjednici džematskog odbora nema kvoruma druga sjednica se održava bez obzira na prisustvo ukoliko je prisutan imam i predsjednik ili potpredsjednik džematskog odbora.

Predsjednik može u svome odsustvu opunomoćiti imama ili potpredsjednika da vode sjednicu džematskog odbora.

Ukoliko nije moguće održati sjednicu džematskog odbora, a postoji potreba za hitnom odlukom, sjednica se može održati putem video konferencije. Ovim putem se ne mogu donositi odluke od strateškog značaja za džemat, kao što su kadrovska pitanja, izmjene budžeta i sl.

Sjednicama predsjedava predsjednik džematskog odbora, koji je dužan pojasniti svaku tačku dnevnog reda prije otvaranja diskusije. Izuzetak su teme uvrštene u dnevni red nakon prijedloga, njih pojašnjava predlagач.

Odluke na sasatanku džematskog odbora se donose natpolovičnom većinom. Imam može uložiti veto na odluke koje se kose sa islamskim principima i obavezan je argumetovano obrazložiti svoj stav. U slučaju potrebe imam će zatražiti mišljenje Savjeta glavnog imama.

U slučaju jednakog broja glasova, odlučuje glas predsjednika ili ako je u pitanju vjerska aktivnost glas imama. U slučaju da je predsjednik odsutan ili suzdržan od glasanja, odlučuje glas imama.

Sjednicama džematskog po potrebi, a na poziv predsjednika ili potpredsjednika i imama mogu prisustvovati i aktivisti džemata, čija stručnost i iskustvo tretiraju određenu temu.

Na svakoj sjednici džematskog odbora se vodi zapisnik i svaka donesena odluka mora biti dokumentovana u zapisniku.

Zapisnik sadrži:

- Vrijeme i mjesto sastanka
- Imena i funkcije prisutnih i odsutnih članova džematskog odbora
- Donesene odluke sa obrazloženjem
- Rezultate glasanja

Zapisnik potpisuju sekretar i predsjednik džemata. Zapisnik treba biti poslat na uvid članovima džematskog odbora u roku od 15 dana nakon sjednice. Finalna verzija zapisnika se usvaja na sljedećem sastanku džematskog odbora.

Odluke džematskog odbora mogu biti dostupne članstvu džemata osim odluka za koje džematski odbor odredi da podliježu tajnosti.

Potrebno je da se u toku sjednice poštuje kodeks lijepog ponašanja, i u slučaju kršenja tog kodeksa predsjednik i imam su dužni odstraniti člana koji je uzrok takvog ponašanja.

§ 7 Opoziv člana džematskog odbora

U slučaju da jedan član džematskog odbora ne izvršava svoje obaveze prema džematu ili svojim radom ruši ugled džemata ili se ne pridržava potpisane izjave i date prisege (Pravilnik o izborima za organe džemata IZBNj) može biti smijenjen odlukom dvotrećinske većine članova džematskog odbora.

§ 8 Nadzorno vijeće i revizori

Izbor članova nadzornog vijeća i revizora, kao i njihovu ulogu u džematu reguliše jedinstveni džematski statut Islamske zajednice Bošnjaka u Njemačkoj i Pravilnik o izborima za organe džemata IZBNj.

Članovi nadzornog vijeća i revizori u pravili ne učestvuju na sjednicama džematskog odbora.

§ 9 Dodatne odredbe

9.1 Uposlenici u džematu

Svi uposleni, volonteri, pripravnici i osobe koje obavljaju poslove za džemat po osnovu ugovora, te osobe koje obavljaju aktivnosti u organima džemata po osnovu sporazuma bilo koje vrste, pridržavaju se principa etike i islamskog ponašanja u svome djelovanju.

9.2. Tajnost podataka i publicitet

Zapisnici džematskog odbora i dostupne informacije ne smiju se ustupiti trećim licima.

Treće lice je osoba koja nije član džematskog odbora. Treće lice je također bilo koja organizacija ili revizori i članovi komisija koji, po potrebi, prisustvuju sjednicama.

Zapisnici džematskog odbora nisu javni. Međutim, odluke džematskog odbora su javne, osim u iznimnim slučajevima kada džematski odbor odluči drugačije. Takve odluke se objavljuju na zaštićenom dijelu džematske internet stranice ili na oglasnoj ploči u prostorijama džemata.

Odredbe o publicitetu i tajnosti podatka su važeće i nakon prestanka mandata člana u džematskom odboru.

Svaki džematski odbor u okviru IZBNJ dužan je poštovati odredbe ovog Pravilnika o radu džematskog odbora IZBNJ. Dopune i izmjene ovome Pravilniku se šalju kao prijedlozi Izvršnom odboru Islamske zajednice Bošnjaka u Njemačkoj, te se oni shodno odluci Izvršnog odbora dalje proslijeđuju Skupštini Islamske zajednice Bošnjaka u Njemačkoj na usvajanje.

§ 10 Stupanje na snagu

Pravilnik o radu džematskih odbora IZBNj usvojen je na Skupštini Islamske zajednice Bošnjaka u Njemačkoj dana _____ godine.